

*Wasat* adalah warkah dalam talian terbitan Pergas. Diwujudkan bagi menerbitkan apa jua penulisan hasil kajian dan pemikiran yang bertemakan *wasatiyah* (kesederhanaan). Ia bertujuan menyebarkan idea dan menggalakkan wacana *wasatiyah* dalam kefahaman dan amalan Islam dalam konteks masyarakat Islam Singapura.

Sumbangan bahan penulisan amat dialu-alukan. Semua bahan penulisan haruslah memenuhi kriteria berikut:

- Bertemakan *wasatiyah* atau relevan dengan tema *wasatiyah*. Penyumbang boleh menulis dari apa jua sudut i.e. fiqh, akidah, akhlak, falsafah, sosio-agama, atau politik-agama asal sahaja isinya dapat dikaitkan dengan tema *wasatiyah*.
- Panjang penulisan ialah, minimum 1000 perkataan dan maksimum 2500 perkataan.

Penerbitan penulisan yang disumbangkan ialah atas budi bicara penuh pihak penyunting.

Pihak penyunting mempunyai hak untuk melakukan suntingan yang munasabah bagi bahan yang disumbangkan atas faktor-faktor bahasa atau ruang.

Untuk menyumbang, sila hantarkan penulisan anda ke [wasat@pergas.org.sg](mailto:wasat@pergas.org.sg)

**Barisan Penyunting:** Ustaz Irwan Hadi Mohamad Shuhaimi, Ustaz Mohammad Yusri Yubhi Mohd. Yusoff, Ustaz Muhammad Haniff Hassan, Puan Sundusia Rosdi **Grafik / halaman web / pembantu teknikal:** Remy Mahzam, Ustazah Nurhafizah Azman

Edisi (Edition) no. 26 / April 2019

#### Kandungan

- **Dari meja penyunting...** (mukasurat 2)
- **Islam dan Penuaan (Bahagian 1): Pemikiran Asas**, oleh Ustaz Muhammad Haniff Hassan (mukasurat 3)
- **Kesederhanaan Dalam Seni dan Hiburan**, oleh Ustaz Muhammad Husin bin Masnin (mukasurat 10)
- **Hukum Masjid Bertempoh Dalam Konteks Singapura**, oleh Ustaz Dr. Muhammad Adib Termizi (mukasurat 13)
- **Islam dan Penuaan (Bahagian 2): Perancangan dan Pengurusan**, oleh Ustaz Muhammad Haniff Hassan (mukasurat 18)

*Nota: Hakcipta penerbitan artikel ini dimiliki oleh Pergas. Tidak dibenarkan mengulang cetak artikel ini di mana-mana wadah penerbitan lain dan dalam bentuk apa jua bentuk tanpa izin dari Pergas. Namun, keizinan diberikan untuk mengongsi artikel ini melalui alamat url yang asal.*

*Segala pendapat yang yang dikemukakan oleh para penulis artikel adalah milik penulis dan tidak mewakili pendirian rasmi Pergas, kecuali jika dinyatakan sedemikian secara tersurat oleh Pergas.*

#### CONNECT WITH US



[www.wasatonline.wordpress.com](http://www.wasatonline.wordpress.com)

### Dari meja penyunting....

Alhamdulillah, sekali lagi *Wasat* dapat berada di pangkuan para pembaca dengan terbitnya edisi terbaru no. 26/April 2019.

Kehadiran bulan April ini bersamaan pula dengan kehadiran bulan Syaaban yang menjadi petanda akan hampirnya bulan Ramadan yang mulia.

Bersamalah kita berdoa agar Allah memberi kekuatan kepada kita semua untuk membanyakkan ibadah sebagai persiapan bagi menghadapi Ramadan dan memanjangkan usia untuk bertemu Ramadan sekali lagi pada tahun ini.

*Wasat* kali ini menerbitkan empat artikel bagi para pembaca. Menjadi harapan pihak penerbit agar artikel-artikel ini bermanfaat dalam menambah ilmu dan meluaskan ufuk pemikiran para pembaca hingga dapat menjalani hidup sebagai Muslim di Singapura atas prinsip *wasatiyah*.

Artikel pertama ialah sumbangan Ustaz Muhammad Haniff Hassan yang bertajuk **Islam dan Penuaan: Pemikiran Asas (Bahagian 1)**. Artikel ini menyentuh tentang perspektif Islam mengenai usia tua dengan tujuan meletakkan asas bagi menangani isu-isu penuaan di kalangan masyarakat Muslim Singapura yang merupakan satu isu kritikal yang bakal dihadapi di masa akan datang yang memerlukan persiapan yang rapi pada hari ini. Hal ini pula memerlukan pengembelangan tenaga badan-badan Islam. Namun untuk badan-badan ini mampu melaksanakan usaha ini dengan baik sesuai dengan garis pandu agama, mereka perlu diberi penjelasan akan perspektif Islam tentang isu ini. Moga artikel ini dapat menyumbang kepadanya. Artikel ini disambung dengan artikel kedua yang diterbitkan sebagai artikel keempat dalam *Wasat* kali ini.

Artikel kedua bertajuk **Kesederhanaan Dalam Seni dan Hiburan**, oleh Ustaz Muhammad Husin bin Masnin. Artikel ini membicarakan akan sikap saksama Islam mengenai seni dan hiburan, iaitu ia pada dasarnya bukan sesuatu yang haram. Islam hanya meletakkan syarat-syarat tertentu bagi membataskan keinginan manusia yang sering kali cenderung pada



nafsu, jika dibiarkan tanpa batasan. Namun apa yang harus pula, tidaklah wajar dikecapi secara berlebihan kerana ia menyalahi prinsip *wasatiyah* Islam.

Artikel ketiga bertajuk **Hukum Masjid Bertempoh Dalam Konteks Singapura**, oleh Ustaz Dr. Muhammad Adib Termizi.

Artikel ini berusaha untuk mengkontekstualisasikan pemikiran yang dominan di dalam fiqh mengenai sifat masjid, iaitu ia haruslah sebuah tanah dan bangunan yang berstatus wakaf selama-lamanya. Pemikiran ini bercanggah dengan hakikat banyak masjid-masjid baru di Singapura yang dibina atas tanah yang mempunyai tempoh pajakan tertentu, bukan wakaf selama-lamanya. Ini pula mempunyai kesan pada hukum solat Tahiyat Masjid, beriktikaf dan solat Jumaat. Dengan menggali khazanah ilmu ulama fikih, penulis mengemukakan cara mengharmonikan pemikiran tradisional yang dominan yang dinyatakan dengan realiti Singapura.

Artikel keempat ialah sambungan bagi artikel pertama yang bertajuk **Islam dan Penuaan: Perancangan**

**dan Pengurusan (Bahagian 2)**, oleh Ustaz Muhammad Haniff Hassan. Sebagai sambungan dari artikel pertama pertama, artikel ini memberi fokus pada kepentingan sikap pro-aktif bagi individu dan masyarakat Muslim Singapura dalam menghadapi hari tua dan masyarakat yang akan semakin menua di tahun-

tahun akan datang. Penulis menegaskan merancang dan mengambil langkah-langkah pencegahan akan risiko yang datang bersama usia tua adalah sesuatu yang dianjurkan oleh Islam. Maka Muslim tidak seharusnya bersikap pasrah dan berserah sahaja pada keadaan. Penulis juga berhujah bahawa badan-badan Islam memikul tanggungjawab untuk menangani isu penuaan (menjaga kebajikan warga tua) bagi memenuhi fardu kifayah (kewajiban kolektif) masyarakat Islam, sebagai tambahan ke atas tanggungjawab individu warga tua sendiri, keluarganya dan. Penulis juga aspek-aspek yang perlu diberi perhatian dalam penjagaan warga tua, iaitu kerohanian, kesihatan dan ekonomi warga tua.

Selamat membaca.. Bacalah dengan nama Tuhanmu..





## Islam dan Penuaan (Bahagian 1): Pemikiran Asas<sup>1</sup>

Oleh Ustaz Muhammad Haniff Hassan

### Pengenalan

Salah satu cabaran sosial yang bakal dihadapi oleh masyarakat Singapura di masa akan datang ialah menangani penuaan rakyatnya.

Hal ini dinyatakan oleh pemerintah sendiri berdasarkan data penduduk yang dikumpulkan. Data ini menunjukkan bahawa jumlah rakyat Singapura yang berada di usia tua akan bertambah dari era sebelum ini sebagai akibat dari penurunan kadar kelahiran dan peningkatan jangka hayat individu kerana kemajuan dalam banyak aspek kehidupan selama beberapa dekad yang lalu.<sup>2</sup>

Fenomena penuaan bukan sesuatu yang baru bagi Singapura kerana ia adalah sesuatu yang tabi'ii yang berlaku sepanjang masa. Namun peningkatan signifikan kadar penuaan di kalangan rakyat Singapura memberi cabaran baru. Jika tidak ditangani dengan baik, ia boleh menimbulkan pelbagai masalah yang antaranya akan menjejaskan warga tua seperti pengabaian kebajikan mereka yang sebelum ini telah memberi sumbangan kepada kemajuan Singapura. Ini bukan hanya situasi yang tidak adil bagi mereka kerana penjagaan kebajikan mereka adalah hak asasi mereka sebagai rakyat. Selain itu, tiada seorang rakyat pun yang patut dilayan seperti "habis madu sepah dibuang".

Jika pengabaian terhadap nasib warga tua wujud secara berleluasa kerana kecuai dalam membuat perancangan yang sepatutnya, ia, bukan hanya akan menjejaskan moral warga tua, tapi juga rakyat yang lain. Rakyat akan merasa kerja keras pada hari ini tidak berguna kerana kebajikan mereka bakal terabai apabila sumbangan mereka kepada ekonomi negara telah tiada disebabkan usia tua.

Masyarakat Muslim Singapura tidak terkecuali dari menghadapi masalah penuaan di masa akan datang

kerana ia juga mengalami penurunan kadar kelahiran dan peningkatan jangka hayat.

Atas dasar ini, masyarakat Muslim Singapura perlu berinisiatif untuk menangani masalah ini juga, bagi melengkapi usaha-usaha pemerintah.

Maka memahami perspektif agama Islam berkaitan isu penuaan menjadi penting kerana;

- segolongan masyarakat Muslim pasti ingin tahu panduan dan sikap Islam dalam isu penuaan bagi menanganinya di peringkat individu atau menyumbang dalam program kemasyarakatan
- perspektif agama boleh menjadi sumber yang positif bagi menangani isu ini
- membantu merangka apa jua inisiatif berkaitan isu penuaan sesuai dengan nilai-nilai pegangan masyarakat Muslim Singapura kerana pengaruh Islam yang kuat terhadap kehidupan mereka
- mengukuhkan pegangan masyarakat Muslim terhadap agama Islam dengan menjadikannya relevan bagi cabaran semasa hidup mereka
- institusi agama Islam seperti masjid, madrasah dan asatizah dapat dimanfaatkan bagi menangani isu penuaan dalam masyarakat Muslim yang akan turut menyumbang di peringkat nasional.

Islam diwahyukan oleh Allah taala melalui rantaian para Nabi untuk menjadi panduan bagi kehidupan manusia. Kehidupan di sini merujuk kepada segala aspeknya dan bukan terbatas pada soal akidah dan ritual sahaja.<sup>3</sup>

Di sisi Al-Quran juga, kitab suci umat Islam, Islam disifatkan sebagai agama fitrah (semula jadi, tabi'ii) bagi manusia.<sup>4</sup>

Sebagai panduan hidup dan fitrah bagi manusia, Islam pastinya mempunyai panduan asasi berkaitan penuaan sebagai satu fenomena alami dalam jangka hayat manusia; apakah sikap yang dianjurkan oleh Muslim terhadap penuaan? bagaimanakah Muslim berhadapan dengan penuaan di peringkat peribadi dan masyarakat? apakah objektif yang perlu dicapai dari fasa kehidupan tua seorang Muslim?



Artikel ini ditulis bagi meneroka idea asas Islam, bukan sikap komprehensif Islam, dalam isu penuaan dengan tujuan untuk meletakkan asas yang betul bagi individu dan institusi masyarakat Muslim dalam merangka inisiatif bagi menghadapi cabaran penuaan.

Apa yang dilakukan ini pula bukanlah sesuatu yang baru. Ia hanyalah penerusan pada tradisi para ulama sejak zaman dahulu hingga hari ini dan kesinambungan dalam tradisi ilmu yang telah ada sekian lama.

Perhatian mengenai warga tua dan kehidupan di masa tua ditunjukkan oleh para ulama silam, antaranya, dengan mendedikasikan bab-bab khusus berkaitannya. Sebagai contoh Al-Bukhari membuat tiga bab dalam bukunya *Al-Adab Al-Mufrad* berkaitan usia tua; *Bab Al-Kabir (Bab Orang Tua)*, *Bab Fadl Al-Kabir (Bab Kelebihan Orang Tua)* dan *Bab Yubda' Al-Akbar Bi Al-Kalam Wa Al-Sual (Bab Memulakan Orang Tua Bercakap dan Menyoal)*.<sup>5</sup>

Selain itu, sesetengah ulama menulis buku-buku khusus berkaitan dengan usia tua sebagai panduan Muslim.<sup>6</sup> Usaha ini diteruskan pula oleh para ulama dan pemikir masa kini dan antara karya-karya yang boleh dijadikan rujukan.<sup>7</sup> Semua ini merupakan khazanah yang telah sedia ada untuk dimanfaatkan bagi sesiapa yang berminat untuk mendalami isu ini, merangka polisi, melakar perancangan atau melaksanakan program-program bagi menangani cabaran penuaan di kalangan masyarakat Muslim, dari kaca mata Islam.

Artikel ini juga merupakan kesinambungan dari usaha-usaha lepas dan hanyalah satu sumbangan kecil bagi isu yang dibicarakan. Namun diharapkan ia bermanfaat bagi yang berminat mengenai isu penuaan.

### Penuaan dalam Islam

Sememangnya soal penuaan memang disebut dalam Al-Quran dan hadith yang darinya dapat dirumuskan pelbagai pengajaran, bimbingan, petunjuk dan hukum

Islam untuk manusia berkaitan pelbagai aspek penuaan.

Al-Quran mengandungi banyak ayat yang membicarakan tentang penuaan. Antara perkara penting yang disebut dalam Al-Quran sebagai asas pemikiran bagi menangani isu penuaan di kalangan Muslim ialah:

- penuaan adalah satu fenomena alami dan sebahagian dari tahap-tahap kehidupan manusia sebelum ia berakhir dengan kematian, namun tidak semua manusia akan melalui fasa tua disebabkan ajalnya datang lebih awal
- penuaan membawa perubahan pada manusia,

iaitu kemerosotan pada kekuatan dan fungsi tubuh, penampilan dan intelek


- kepentingan sikap perihatin dan ambil berat akan fasa usia tua yang akan menjelang dan sekali gus memikirkan tentang langkah persediaan

- penuaan dikaitkan dengan peringatan tentang kematian yang pasti datang pada manusia sebagai permulaan bagi hidup di alam, yang walau pun hanya bersifat peralihan, tetapi petunjuk samada seseorang itu akan bahagain di syurga atau celaka di neraka di Akhirat nanti.

Terdapat lima ayat Al-Quran yang memberitahu bahawa penuaan adalah satu fasa tabi'i dalam kehidupan manusia.

Allah taala berfirman;

- "Dia-lah yang menciptakan kamu dari tanah kemudian dari setetes, air mani, sesudah itu dari segumpal darah, kemudian dilahirkannya kamu sebagai seorang anak, kemudian (kamu dibiarkan hidup) supaya kamu sampai kepada masa (dewasa), kemudian (dibiarkan kamu hidup lagi) sampai tua, di antara kamu ada yang diwafatkan sebelum itu. (Kami perbuat demikian) supaya kamu sampai kepada ajal yang ditentukan dan supaya kamu memahami (nya)." (Ghafir: 67)
- "Allah, Dialah yang menciptakan kamu dari keadaan lemah, kemudian Dia menjadikan (kamu) sesudah keadaan lemah itu menjadi kuat,



kemudian Dia menjadikan (kamu) sesudah kuat itu lemah (kembali) dan beruban. Dia menciptakan apa yang dikehendaki-Nya dan Dialah Yang Maha Mengetahui lagi Maha Kuasa.” (Al-Rum: 54)

- “Hai manusia, jika kamu dalam keraguan tentang kebangkitan (dari kubur), maka (ketahuilah) sesungguhnya Kami telah menjadikan kamu dari tanah, kemudian dari setetes mani, kemudian dari segumpal darah, kemudian dari segumpal daging yang sempurna kejadiannya dan yang tidak sempurna, agar Kami jelaskan kepada kamu dan Kami tetapkan dalam rahim, apa yang Kami kehendaki sampai waktu yang sudah ditentukan, kemudian Kami keluarkan kamu sebagai bayi, kemudian (dengan beransur-ansur) kamu sampailah kepada kedewasaan, dan di antara kamu ada yang diwafatkan dan (ada pula) di antara kamu yang dipanjangkan umurnya sampai pikun, supaya dia tidak mengetahui lagi sesuatupun yang dahulunya telah diketahuinya. Dan kamu lihat bumi ini kering, kemudian apabila telah Kami turunkan air di atasnya, hiduplah bumi itu dan suburlah dan menumbuhkan berbagai macam tumbuh-tumbuhan yang indah.” (Al-Haj: 5)
- “Allah menciptakan kamu, kemudian mewafatkan kamu; dan di antara kamu ada yang **dikembalikan kepada umur yang paling lemah (pikun), supaya dia tidak mengetahui lagi sesuatu pun yang pernah diketahuinya.** Sesungguhnya Allah Maha Mengetahui lagi Maha Kuasa.” (Al-Nahl: 70)

Adapun ayat-ayat Al-Quran yang memberi petunjuk akan perubahan-perubahan manusia di usia tua ialah:

- perubahan penampilan dalam bentuk rambut beruban dalam firman Allah taala dalam Al-Rum: 54 yang telah disebut di atas dan ayat,

“Ia [Zakaria] berkata: Ya Tuhanku, **sesungguhnya tulangku telah lemah dan kepalaku telah ditumbuhi uban**, dan aku belum pernah kecewa dalam berdoa kepada Engkau, ya Tuhanku.” (Maryam: 4)

- kemerosotan pada kekuatan dan tenaga pada tubuh badan sebagaimana yang disebut dalam firman Allah taala dalam Al-Rum: 54, Al-Haj: 5 dan Al-Nahl: 70.

Manakala firman Allah taala dalam Maryam: 4 pula menyebut secara khusus tentang sakit pada tulang disebabkan kemerosotan pada kekuatannya.

- kemerosotan pada daya intelek dan ingatan hingga ke peringkat demensia dan nyanyuk sebagaimana yang disebut Al-Haj: 5, Al-Nahl: 70 dan ayat,

“Sesungguhnya Kami telah menciptakan manusia dalam bentuk yang sebaik-baiknya. **Kemudian Kami kembalikan dia ke tempat yang**

**serendah-rendahnya.**” (Al-Tin: 5-6)

Sebahagian ulama mentafsirkan Al-Tin: 6 dengan maksud peringkat usia tua yang lanjut di mana seseorang itu berada dalam keadaan yang hilang ingatan kerana demensia, nyanyuk dan lemah, iaitu terbaring di katil, tidak mampu urus diri sendiri dan bergantung pada orang lain untuk mengurus dirinya seperti bayi kecil, sedangkan semasa mudanya ia seorang yang kacak/cantik, kuat dan pandai.

- kemerosotan pada kesuburan untuk mendapat zuriat sebagaimana disebut dalam firman Allah taala,

“Zakaria berkata: Ya Tuhanku, bagaimana akan ada anak bagiku, padahal isteriku adalah seorang yang mandul dan **aku (sendiri) sesungguhnya**



**sudah mencapai umur yang sangat tua.”**  
(Maryam: 9)

“Isterinya [Ibrahim] berkata: Sungguh mengherankan, apakah aku akan melahirkan anak padahal aku adalah **seorang perempuan tua, dan ini suamiku pun dalam keadaan yang sudah tua** pula? Sesungguhnya ini benar-benar suatu yang sangat aneh.” (Hud: 72)

Hakikatnya manusia tidak memerlukan ayat Al-Quran untuk mengetahui tentang penuaan dan kesannya pada diri manusia sebagai satu fenomena tabi'ii

kerana ia adalah satu hakikat yang dapat dilihat dan alami oleh manusia. Ia juga bertepatan dengan dapatan sains. Namun, sebutannya dalam Al-Quran

mempunyai signifikansi tersendiri, iaitu pemberitahuan kepada bahawa Islam memberi perhatian akan persoalan ini dan menuntut Muslim agar turut berfikir dan mengambil perhatian tentangnya. Hal ini disokong oleh firman Allah taala yang meletakkan usia 40 tahun sebagai masa kritikal untuk seorang Muslim melakukan refleksi akan masa lalunya dan masa akan datangnya iaitu masa tua. Allah taala berfirman,

**“...sehingga apabila dia telah dewasa dan umurnya sampai empat puluh tahun** ia berdoa: Ya Tuhanku, tunjukkanlah aku untuk mensyukuri nikmat Engkau yang telah Engkau berikan kepadaku dan kepada ibu bapakku dan supaya aku dapat berbuat amal yang saleh yang Engkau redai; berilah kebaikan kepadaku dengan (memberi kebaikan) kepada anak cucuku. Sesungguhnya aku bertaubat kepada Engkau dan sesungguhnya aku termasuk orang-orang yang berserah diri.” (Al-Ahqaf: 15)

Usia 40 tahun sebagai stesyen kehidupan dipilih kerana umumnya ia dianggap sebagai pemisah antara

usia muda dan usia tua. Namun, sama penting dengan refleksi diri ialah anjuran ke atas Muslim untuk mengambil langkah-langkah persiapan bagi menghadapi fasa baru, pasca usia 40 tahun sebagai permulaan bagi usia tua, baik di peringkat individu atau masyarakat dan tidak bersikap sambil lewa serta menyerahkan pada keadaan semata-mata. Hal ini akan disokong oleh beberapa hadis yang akan dibicarakan di bawah nanti.

Kaitan penuaan dengan kematian jelas dalam Ghafir: 67 dan diperkuatkan oleh ayat sesudahnya, **“Dia-lah yang menghidupkan dan mematikan,**

Dia menetapkan sesuatu urusan, Dia hanya berkata kepadanya: Jadilah, maka jadilah ia.” (Ghafir: 68).

Perkara yang sama juga dapat dilihat pada ayat

sesudah Al-Haj: 5, yang diperkuatkan dengan dua ayat sesudahnya yang mana Allah taala seolah-olah menuntut manusia berfikir tentang kematian dan Akhirat setelah berfikir tentang fasa-fasa kehidupan;

**“Yang demikian itu, karena sesungguhnya Allah, Dialah yang hak dan sesungguhnya Dialah yang menghidupkan segala yang mati dan sesungguhnya Allah Maha Kuasa atas segala suatu. Dan sesungguhnya hari kiamat itu pastilah datang, tak ada keraguan padanya; dan bahwasanya Allah membangkitkan semua orang di dalam kubur.”** (Al-Haj: 6-7)

Dalam hal kaitan penuaan dengan kemerosotan pada kekuatan dan fungsi tubuh dan kematian, dua poin berikut perlu difahami bersama.



Pertama, Al-Quran memberi tahu, dalam Ghafir: 67 dan Al-Haj: 5, bahawa tidak semua manusia akan melalui fasa-fasa hidup yang dinyatakan dalam ayat-ayat itu. Sebahagian dari mereka akan mengalami kematian sebelum melalui fasa penuaan. Dengan kata lain, mati tidak hanya datang setelah usia tua dan di kalangan warga tua sahaja. Ia boleh datang kepada sesiapa tanpa kira di fasa kehidupan mana dia berada. Hal ini bermakna persiapan menghadapi kematian berbeza dengan persiapan menghadapi penuaan. Persiapan kematian menjangkau semua manusia tanpa kira usia, walau pun ia lebih pasti dan kritikal dalam persiapan bagi fasa penuaan.

Kedua, walau pun Al-Quran mengaitkan penuaan dengan demensia dan nyanyuk, realiti kehidupan dan sains menunjukkan bahawa tidak semua mereka yang mencapai usia lanjut mengalami keadaan ini sebelum menemui kematian.

Ada kalangan orang tua yang berusia tujuh puluh dan lapan puluh tahun tapi tidak mengalami kededua keadaan yang dinyatakan. Apa yang Al-Quran nyatakan ialah kededua keadaan itu sebagai perkara yang boleh berlaku apabila berada dalam usia tua, bukan sesuatu yang mesti berlaku.<sup>8</sup>

Kajian sains pula membantu untuk memahami pandangan Al-Quran ini bahawa berlakunya kededua keadaan itu bergantung pada pelbagai faktor dan faktor-faktor ini boleh ditangani bagi mengelakkan, merawat, mencegah atau meminimalkan risiko demensia, nyanyuk dan segala simptom penuaan yang telah diketahui.

Gabungan dari pernyataan Al-Quran, dapatan sains dan realiti kehidupan memberi kefahaman bahawa penuaan adalah sesuatu yang pasti berlaku tapi kadar keseriusan kemerosotan tenaga dan fungsi tubuh boleh diurus dengan baik sehingga dapat dielak atau diminimalkan.<sup>9</sup> Poin ini akan disokong pula oleh beberapa hadis yang akan dibicarakan nanti berkaitan anjuran Islam untuk merancang dan mengurus usia tua yang meliputi soal mencegah dan meminimalkan

kemerosotan kualiti kehidupan dan bukan bersikap pasif atau berserah pada keadaan semata-mata.

Kajian terhadap hadis menunjukkan Rasulullah s.a.w juga mahu Muslim memberi perhatian terhadap penuaan dengan menjelaskan sikap yang betul terhadap usia tua, perkara yang perlu diberi perhatian oleh individu apabila memasuki usia tua dan peranan individu dan masyarakat terhadap warga tua dan langkah.

Dari sudut sikap, Rasulullah mengajar Muslim agar bersikap positif apabila memasuki usia tua, walau pun kemerosotan kualiti hidup di usia berkenaan adalah sesuatu yang tabi'i sebagaimana yang disebutkan dalam Al-Quran juga.

Antara sikap positif yang dianjurkan oleh Rasulullah s.a.w ialah usia yang panjang adalah;

- usia panjang petanda keberkatan hidup dan membawa keberkatan pada kehidupan.<sup>10</sup>


Rasulullah s.a.w bersabda, **"Keberkatan itu bersama warga tua kamu."** (Riwayat Ibn Hibban)

Di dalam hadis lain, disebutkan sabda beliau s.a.w berbunyi, **"Kebaikan itu bersama warga tua kamu."** (Riwayat Al-Bazzar)

- usia panjang adalah pintu bagi menggandakan amal dan memperoleh kedudukan yang lebih dekat kepada Allah taala<sup>11</sup>

Apabila ditanya mengenai siapakah manusia yang paling baik, Rasulullah s.a.w menjawab, **"Seorang yang panjang umurnya dan baik amalannya pula."** (Riwayat Al-Turmuzy)

"Tidak ada seorangpun yang lebih utama di sisi Allah daripada **seorang Mukmin yang diberi umur panjang dalam agama Islam untuk bertasbih, bertakbir, dan bertahlil untukNya.**" (Riwayat Ahmad dan Abu Ya'la)





- usia panjang memberi kemuliaan dan hak penghormatan dalam masyarakat<sup>12</sup>

Rasulullah s.a.w bersabda,

**“Uban adalah cahaya bagi seorang mukmin. Tidaklah seseorang beruban, walau hanya sehelai, kecuali setiap ubannya akan dihitung sebagai kebaikan yang akan meninggikan darjatnya.”** (Riwayat Al-Baihaqi)

“Bukan dari kalangan kami, sesiapa yang tidak menyayangi yang muda **dan tidak menghormati yang dari tua kami.**” (Riwayat Al-Bukhari)

“Termasuk dalam memuliakan keagungan Allah ialah **memuliakan orang tua Muslim**, penghafaz Al-Quran yang tidak berlebihan dan mencuaikannya, dan penguasa yang adil.” (Riwayat Abu Dawud)

Berkaitan dengan perkara-perkara yang perlu diberi perhatian bagi mereka yang akan memasuki usia tua, Rasulullah mengingatkan bahawa memasuki usia tua yang diiringi dengan kelemahan tubuh badan dan risiko alami pelbagai penyakit tidak melepaskan Muslim dari tanggungjawab berbudiyah kepada Allah taala (melaksanakan perintah yang diwajibkan dan meninggalkan apa yang diharamkan), sebagaimana firman Allah taala, **“Dan tidaklah Aku ciptakan jin dan manusia kecuali untuk beribadah kepadaKu.”** (Al-Zariyat: 56).

Tanggungjawab ini mestilah diteruskan hingga ke akhir hayat sebagaimana firman Allah taala, **“Wahai orang-orang yang beriman! Bertakwalah kepada Allah sebenar-benar takwa kepada-Nya dan janganlah kamu mati kecuali dalam keadaan Muslim.”** (Ali Imran: 102).<sup>13</sup>

Kelemahan pada usia tua tidak boleh dijadikan alasan untuk berhenti dari menunaikan ubudiyah. Apa yang dibenarkan ialah mengambil *rukhsah* (keringanan)

yang sah di sisi syariah seperti solat duduk atau baring, tidak berpuasa apabila telah hilang upaya untuk melakukannya dan digantikan dengan fidyah dan mewakilkan orang lain melakukan haji untuk diri, bukan berhenti dari beribadah kepada Tuhan.<sup>14</sup>

Rasulullah s.a.w juga mengingatkan agar Muslim melakukan introspeksi diri apabila memasuki usia tua. Melalui introspeksi ini, Muslim kenal pasti kesilapan dan kelemahan yang ada pada dirinya lalu bertaubat dan berusaha pula untuk mengubah ke keadaan yang lebih baik. Jika tidak, seorang Muslim itu berisiko

untuk jatuh dalam keadaan yang mana peluang untuk berubah dan meninggalkan dosa ditutup sehingga akhirnya dia menemui kematian dalam keadaan yang tercela. Walaupun introspeksi dan taubat bukan sesuatu yang khusus bagi warga tua, tapi ia lebih dipertekankan kepada mereka oleh Rasulullah s.a.w kerana

kematian lebih pasti dan dekat bagi golongan ini. Sebab itulah amaran keras juga diberikan kepada mereka yang terus dalam kelalaian kerana, setelah peluang yang banyak diberi melalui usia yang panjang, mereka masih lagi tidak sedar diri dan hidup dalam kelalaian. Sebagai contoh ialah sabda Rasulullah s.a.w berkaitan mereka yang telah menjangkau umur 60 tahun, **“Allah memberi uzur kepada seseorang yang Dia akhirkkan ajalnya, hingga sampai usia 60 tahun.”** (Riwayat Al-Bukhari)

Ibn Abbas mengaitkan hadis ini dengan firman Allah taala, **“Bukankah Kami telah melanjutkan umur kamu sehingga sempat untuk beringat bagi sesiapa yang mahu beringat.”** (Fatir: 37) dengan berkata, **“Umur yang Allah tidak lagi menerima alasan bagi anak Adam dalam firmanNya ini ialah 60 tahun.”**<sup>15</sup>

Al-Khattabi pula berkata, **“Orang yang Allah panjangkan umur sehingga 60 tahun, tidak diterima lagi keuzuran (alasan). Hal ini kerana umur 60 tahun**





merupakan umur yg dekat dengan kematian, umur kembali bertaubat, khusyuk dan bersiap-siap bertemu Allah.”<sup>16</sup>

Rasulullah s.a.w juga melalui pelbagai hadis meletakkan hak bagi warga tua yang perlu ditunaikan oleh Muslim baik secara individu atau kolektif atau masyarakat, iaitu:

- hak untuk dihormati
- hak untuk dibela nasib dan dijaga kebajikannya disebabkan keadaan diri yang sudah lemah atau sakit atau keadaan ekonomi yang sempit kerana hilang upaya mencari rezeki atau ketiadaan simpanan yang memadai.<sup>17</sup>

Contoh hadis berkaitan ini telah disebutkan di atas.

Segala anjuran-anjuran ini memberi pengajaran bahawa soal penuaan dan kebajikan warga tua bukan soal peribadi atau individu yang berada dalam fasa

hidup itu semata-mata. Mereka yang selain dari warga tua ada peranan dan kewajipan yang perlu ditunaikan terutama kepada warga tua yang tiada kemampuan untuk menjaga kebajikan diri sendiri. Hal ini akan dihuraikan lebih lagi di bawah nanti.

.... bersambung di **Islam dan Penuaan (Bahagian 2): Perancangan dan Pengurusan**, di mukasurat 18.



<sup>1</sup>Kertas ini disiapkan atas permintaan dari Masjid Darussalam bagi menjadi dasar bagi perancangan dan pelaksanaan program-program bagi warga tua Muslim di kawasan perumahan sekitar masjid secara khusus dan di daerah-daerah lain di Singapura secara umum.

<sup>2</sup>Lihat Population Trends: Facts and Figures on Singapore's Population in 2016, *population.sg*, di <https://www.population.sg/population-trends/demographics> (23 September 2018).

<sup>3</sup>Lihat tafsir bagi Ali Imran: 19 dan Ali Imran: 85.

<sup>4</sup>Lihat tafsir bagi Al-Rum: 30

<sup>5</sup>Benouda Bensaid and Fadila Grine (2014), "Old Age and Elderly Care: An Islamic Perspective", *Cultura: International of Journal of Philosophy of Culture and Axiology*, 11:1, ms. 141-2

<sup>6</sup>Ibid, ms. 142.

<sup>7</sup>Lihat Mahjabeen Ahmad (2017), *Muslim Aged Care*, South Australia: ACH Group; Mahjabeen Ahmad dan Shamsul Khan (2016), "A Model of Spirituality for Ageing Muslims", *Journal of Religious Health*, 55:3; Sa'ad Al-Din Al-Hilali (2002), *Qadiyyat Al-Musinnin Wa Ahkamuhum Al-Khassah Fi Al-Fiqh Al-Islami*, Kuwait: Jami'at Al-Kuwait; `Abd Allah bin Nasir Al-Sadhan (1999), "Ri'ayat Al-Musinnin Fi Al-Islam", *Majallat Al-Shari'ah*, no. 33; Yusuf Al-Qaradhawi (2009), *Huquq Al-Shuyukh Wa Al-Musinnin Fi Daw' Al-Shari'ah Al-Islamiyah*, Kaheerah: Maktabah Wahbah; Abd Al-Razzaq `Abd Al-Muhsin Al-Badr (2011), *Huquq Kibar Al-Sin Fi Al-Islam*, Riyad: Maktabat Al-Malik Fahd Al-Wataniyah; Hakim Mohammed Said (1989), "Islam and the Health of Elderly", *Journal of Religion & Aging*, 4:3-4; Benouda Bensaid and Fadila Grine (2014), "Old Age and

Elderly Care: An Islamic Perspective", *Cultura: International of Journal of Philosophy of Culture and Axiology*, 11:1.

<sup>8</sup>Bensaid and Grine (2014), ms. 143-6

<sup>9</sup>Mohd Amzari Tumiran, et. al. (2018), "Senile Dementia from Neuroscientific and Islamic Perspectives", *Journal of Religion and Health*, 57:1, ms. 5-7.

<sup>10</sup>Al-Sadhan (1999), ms.17-21; Bensaid and Grine (2014), ms. 146-9.

<sup>11</sup>Ibid; Ibid.

<sup>12</sup>Ibid, ms. 32-3; Ibid, 148-55.

<sup>13</sup>Mahjabeen Ahmad and Shamsul Khan (2016), "A Model of Sprituality for Ageing Muslims", *Journal of Religion and Health*, 55:3; Sa'id (1989), ms. 27-8; Bensaid and Grine (2014), ms. 143.

<sup>14</sup>Lihat Al-Hilali (2002); Hibah Madhat Raghieb Al-Dalw (2009), *Ahkam Al-Musinnin Fi Fiqh Al-'Ibadat: Dirasah Fiqhiyah Muqaranah*, Gaza: Al-Jami'ah Al-Islamiyah; Haifa' Muhammad Al-Zubaidi (2012), "Ri'ayat Al-Musinnin Fi Al-Tashri' Al-Islami", *Majallat Kulliyat Al-Tarbiyah Al-Islamiyah*, no. 75; Bensaid and Grine (2014), ms. 155-7.

<sup>15</sup>Al-Qurtubi (online), *Al-Jami' Li Ahkam Al-Quran*, di <https://altafsir.com/Tafasir.asp?tMadhNo=1&tTafsirNo=5&tSoraNo=35&tAyahNo=37&tDisplay=yes&UserProfile=0&LanguageId=1> (23 September 2018).

<sup>16</sup>Ibid.

<sup>17</sup>Raudlotul Firdaus Fatah Yasin, Ali Asaa Ali Mubaraak dan Mohd Shah Jani (2016), "Ri'ayat Al-Musinnin Fi Manzur Al-Quran Wa Al-Sunnah Dirasah Mu'asarah", *Global Journal Al-Thaqafah*, 6:1; Al-Zubaidi (2012); Al-Sadhan (1999).



### **Kesederhanaan Dalam Seni dan Hiburan<sup>1</sup>**

*Oleh Ustaz Muhammad Husin bin Masnin*

Perkataan seni bukan suatu yang asing dalam kehidupan kita. Seni bina, seni lukis, seni kata, seni lakon, seni tari, dan pelbagai lagi seni yang muncul dan berkembang dari masa ke semasa.

Seni merupakan hasil kreatif yang indah dizahirkan dari naluri seseorang yang berbakat. Melalui seni seseorang boleh menyampaikan mesej dan tujuan yang terpendam dalam jiwa. Justeru, karya yang terhasil mempunyai maksud tertentu seperti kedamaian, keadilan, kecintaan, kemanusiaan dan sebagainya.

Terdapat aneka karya dalam penghasilan seni kreatif. Ada yang mudah difahami maksudnya ada pula yang sukar seperti seni yang bersifat abstrak. Kita akan menemui pelbagai karya yang berbeza antara individu dengan individu yang lain. Ada pula individu yang menghasilkan karya yang berbeza-beza. Hal ini kerana karya seni itu mempunyai ruang yang luas bagi menghasilkan karya.

Namun, keluasan ini tidak bermakna ianya bebas tanpa sebarang sempadan dan batasan, baik di sisi agama atau di sisi budaya dan logik. Contohnya tarian yang menggiurkan, lukisan tatu, seni kata yang mempunyai maksud negatif, ini semua perkara yang terlarang dalam agama dan tidak diterima juga di sisi budaya tertentu, walaupun ada yang mendakwa bahawa ia termasuk dalam kebebasan berseni. Alasan ini tidak boleh diterima di sisi syarak. Justeru kebebasan untuk berkarya tidak bermaksud semuanya dibenarkan dalam agama, tetapi perlulah berpandukan syariat Islam agar tidak terjerumus ke kancan kemungkaran.

Seni hiburan telah memainkan peranan penting dalam kehidupan seharian kita, sama ada berbentuk nyanyian, lakonan, lawak jenaka dan bermacam lagi. Ianya wujud di mana jua seperti di tv, radio, akhbar, laman sesawang dan di tempat awam.

Lumrah kehidupan manusia memerlukan hiburan agar dapat menghilangkan kebosanan dan membangkitkan keceriaan di kala sedih. Namun, adakah dengan terlalu banyak berhibur ini dapat mencapai misi sebagai khalifah yang mengimarahkan muka bumi ini?

Syeikh Yusuf Al-Qardhawi telah mengarang buku bertajuk *Al-Islam Wa Al-Fan* bermaksud Islam dan seni. Buku ini cukup menarik untuk dibaca kerana ia membincangkan batasan-batasan dalam berhibur yang menjadi lumrah kehidupan manusia. Beliau juga menulis buku *Fiqh Al-Lahw Wa Al-Tarwih* (Fiqh Hiburan dan Rekreasi). Kedua-dua buku ini telah diterjemahkan ke bahasa Melayu. Kedu-dua buku ini bagus dibaca agar orang ramai dapat mencedok manfaat di dalamnya berkaitan hiburan yang sesuai di sisi agama.

Dalam Islam, hiburan bukanlah matlamat utama untuk dicapai oleh manusia. Matlamat utama adalah memakmurkan dunia dengan menyeru kepada kebaikan dan mencegah kemungkaran, supaya ia sejajar dengan peranan sebagai khalifah Allah di muka bumi ini.

Hiburan bukan suatu perkara yang asalnya terlarang. Hanya, manusia hendaklah tidak terlalu asyik dengannya hingga leka untuk mencapai matlamat utamanya. Maka perlulah membezakan matlamat utama untuk dikecapi, yang mana didahulukan dan yang mana dikemudiankan.

Usaha untuk memajukan seni hiburan perlu diolah agar ia membawa erti dan matlamat yang berguna untuk masyarakat. Ia boleh diolah untuk menjadi satu



usaha untuk memajukan seni hiburan 'berbentuk pendidikan dan pengetahuan'. Jika hanya menerapkan hiburan tanpa sebarang unsur pendidikan dan pengetahuan, atau dengan perkataan mudahnya hanya berhibur suka-suka sahaja, ia bakal meleakakan masyarakat untuk terus membangun. Kita tidak ingin melihat budaya hedonisme menapak di dalam masyarakat kita. Sebaliknya kita ingin melihat masyarakat yang berilmu dan berfikir kritis sebagaimana yang pernah dinyatakan oleh Prof. Syed Hussein Alatas dalam bukunya *Intelektual Masyarakat Membangun*.

Seni hiburan yang tidak menyumbang kepada pembangunan dan pemikiran masyarakat perlu dikurangkan kerana, hari ini, sudah terlalu banyak hiburan yang tersebar di sekeliling-kita, baik hasil tempatan atau Barat. Banyak di antaranya yang mempunyai unsur-unsur negatif yang boleh merosakkan pemikiran masyarakat terutamanya golongan muda seperti seni profane yang dinyatakan Prof. Shahnnon Ahmad sebagai seni berbudaya picisan. Di dalam bukunya *Setitis Embun Semarak Api*, beliau berkata;

"Seni bertaraf profane ini lebih berbahaya kerana kewujudan dan pengembangannya tersirat dalam kehalusan dan keindahan yang palsu. Pementasan-pementasan, tarian-tarian, lukisan-lukisan, penulisan-penulisan serta berbagai-bagai jenis kesenian telah mencemarkan martabat ketinggian budi daya insan seterusnya menurunkan maruah insan ke tahap paling bawah."

Maka sudah tiba masanya untuk mengorak langkah maju ke hadapan dalam memajukan seni hiburan berbentuk pendidikan dan pengetahuan.

Dokumentari seperti *Jalan* yang disiarkan di saluran tv Suria dan dipengacarakan oleh Ibrahim Sawifi adalah satu contoh baik bagi seni yang dapat mendidik masyarakat, dan secara tidak langsung ia


menambahkan lagi pengetahuan tentang sejarah Singapura.

Manakala rancangan *Bicara* yang diwawancara oleh Daud Yusof juga satu penghasilan seni yang patut dipuji. Rancangan ini menampilkan individu-individu yang ternama seperti mufti, ahli akademik, sasterawan, peniaga, pelakon, penyanyi dan lain-lain lagi. Ia membantu penonton menyelami pemikiran individu itu dan secara tidak langsung mendorong masyarakat untuk berfikir secara kritis.

Saluran seperti *Discovery Science*, *National Geographic*, *Animal Planet* juga diperlukan bagi menyumbang dalam menjana ilmu pengetahuan masyarakat. Rancangan-rancangan seperti inilah

yang patut diperkayakan dan dimajukan lagi supaya ia dapat membina masyarakat berpengetahuan dan berilmu.

Hiburan berbentuk penulisan juga perlu diberi perhatian sebagai wadah dalam menyumbang kepada pembangunan masyarakat. Justeru, memajukan dan memperkayakan bahan bacaan berbentuk ilmiah dan pengetahuan amat diperlukan. Sudah banyak majalah-majalah hiburan sama ada mengenai artis, fesyen atau sukan. Malangnya kita kekurangan majalah berbentuk ilmu pengetahuan.



Apabila disebut 'novel', akan terlintas dalam fikiran seseorang itu unsur-unsur cinta dan romantis. Sebaliknya novel juga turut mendorong pembaca untuk berfikir secara kritis dan bukan hanya sekadar hiburan berbentuk percintaan sahaja. Inilah yang dilakukan sasterawan di dalam karya-karya mereka agar hasil yang dilakukan tidak kontang dari elemen-elemen nasihat, teladan atau pengajaran. Contohnya sasterawan negara Suratman Markasan, beliau menerapkan unsur menegakkan keadilan seperti di



dalam novelnya *Tiga Lelaki, Di Bumi Mana dan Dunia Bukan Kita Punya*. Manakala pemikir terkenal nusantara Hamka turut menegur secara halus mengenai ketaksuban terhadap bangsa, adat dan pangkat darjat. Ini diluahkan di dalam novelnya *Merantau Ke Deli dan Tenggelamnya Kapal Van Der Wijck*.

Seni juga boleh mengingatkan manusia akan Tuhannya. Ini memerlukan daya kreatif seseorang itu untuk menghasilkan karya yang bermanfaat untuk masyarakat. Tidak mustahil karya itu boleh mendorong yang lain untuk menghasilkan karya yang lebih baik lagi. Secara tidak langsung masyarakat akan bergelumbang dengan hiburan yang mendidik jiwa dan bermanfaat.


Seharusnya seni dan hiburan itu tidaklah gersang dari pengertian yang bermanfaat kepada masyarakat. Ia juga tidaklah menyerlahkan kebebasan sehingga keluar dari kerangka syariah. Justeru kita ingin melihat hasil seni hiburan yang bukan sekadar hebat

dan kreatif, tetapi juga mempunyai unsur-unsur dan elemen-elemen yang mendidik masyarakat ke arah pembangunan. Seeloknya modal dan wang yang ada dibelanjakan untuk karya berbentuk pengajaran dan pendidikan. Kita inginkan ramai golongan cendekiawan dan intelektual di dalam masyarakat kita. Maka dengan hiburan yang mendidik jiwa, akan

menyumbang kepada membentuk insan yang berguna di dunia dan akhirat.

Akhir sekali, perhatikan apa yang dikatakan oleh Prof. Hussein Alatas di dalam bukunya *Kita Dengan Islam: Tumbuh Tiada Berubah*;

“Yang dapat diterima masyarakat ialah pernyataan perasaan seniman yang menggalakkan unsur-unsur moral dan yang memajukan penghidupan manusia. Oleh kerana demikian hakikatnya seni dan masyarakat, maka bagi umat Islam sudahlah jelas bahwa seni itu mesti dipandu oleh ajaran Islam.”



<sup>1</sup>Artikel ini diterbitkan pertama kali dengan tajuk *Bukan Sekadar Seni dan Hiburan* di majalah *Ar-Risalah*, no. 15, Mei-Ogos 2014 dan diterbitkan buat kali kedua dengan tajuk *Seni, hiburan yang didik jiwa boleh bentuk insan berguna* di *Berita Harian*, 20 Mei 2016. Ia telah disunting dengan sedikit penambahan dan pengubahsuaian *Wasat*.



## Hukum Masjid Bertempoh Dalam Konteks Singapura

Oleh Ustaz Dr. Muhammad Adib Termizi

(Artikel ini berasal dari kertas kerja yang dibentangkan penulis dalam seminar fikh masa kini anjuran *Ussuli Faqih Research Centre* di Universiti Sains Islam Malaysia dan pernah diterbitkan di *Jurnal Pengurusan dan Penyelidikan Fatwa Sedunia*, vol. 5, 2015)

### Pendahuluan

Masjid merupakan sebuah institusi mulia di sisi masyarakat Islam. Statusnya sebagai “Rumah Allah” mendorong Muslim berlumba-lumba untuk membina atau menyumbang kepada pembinaannya. Nabi s.a.w juga menjadi pendorong dan penggalak utama dalam membina masjid apabila beliau membina masjid terlebih dahulu sebelum membina rumahnya ketika tiba di Madinah dalam peristiwa hijrah.

Walau demikian umat Islam harus memerhatikan undang-undang setempat dalam pembinaan masjid kerana menselarikan hukum Islam dengan undang-undang setempat amat perlu demi menjaga maslahat kehidupan harmoni bagi semua. Sudah tentu keselarian yang hendak dicapai itu adalah pada perkara yang dapat diterima oleh syarak, bukan sesuatu yang terlarang secara *qat’ii*.

Hal ini dapat dilihat apabila para sahabat yang berhijrah ke Habsyah di bawah pimpinan Saidina Ja’far bin Abi Thalib tidak meminta Najasi menyediakan tanah bagi mereka mendirikan masjid, walaupun mereka menetap di sana pada tempoh yang lama, iaitu dari pertengahan zaman Mekah hingga akhir tahun ke tujuh hijrah.

Masjid yang pertama didirikan di benua Afrika hanya berdiri pada pemerintahan Saidina Umar bin Al Khattab ketika umat Islam menawan Mesir dan dikenali masjid itu dengan Jami’ ‘Amr ibn Al-‘As.

Atas dasar ini umat Islam di Singapura harus mengambil jalan tengah dalam menyikapi

perundangan tanah yang ditetapkan oleh pemerintah Singapura atau SLA (*Singapore Land Authority*). Di antara perundangan tanah yang ditetapkan adalah setiap masjid yang baru dibina di bawah dana pembangunan masjid tertakluk pada had masa yang tertentu.

Perundangan ini menimbulkan percanggahan dengan pendirian umum para fuqaha’ bahawa masjid itu perlu berdiri di atas tanah wakaf dan sesuatu yang diwakafkan tidak boleh terhad dengan waktu. Bertolak dari percanggahan ini, artikel ini ditulis bagi menjelaskan pandangan para ulama terhadap masjid yang terhad dengan tempoh tertentu apakah sah dianggap sebagai sebuah masjid dan hukum yang sesuai yang perlu digunapakai dalam konteks Singapura.

### Definisi masjid

Di sisi bahasa Arab, perkataan “masjid” berasal dari perkataan “sujud” iaitu meletakkan dahi seseorang di atas tanah. Perkataan ini digunakan bagi menunjukkan penghormatan seperti kisah sujud malaikat kepada nabi Adam a.s. dan keluarga nabi Yusuf a.s. kepada beliau. Ia juga digunakan juga dalam bentuk penyembahan dan peribadatan. “Masjid” juga membawa erti tempat sujud sebagaimana yang dikatakan oleh Al-Zajaj, “Setiap tempat yang digunakan untuk beribadat adalah masjid”. “Masjid” juga diertikan secara *majaz* (kiasan) bagi anggota-anggota sujud yang tujuh.

Dalam istilah syariah, “masjid” ialah tanah yang dikhususkan untuk sembahyang dan telah dikeluarkan dari hak milik pemilik tanah tersebut untuk dijadikannya bagi umat Islam secara umum. Dr. Ibrahim Salih pula mendefinisikan masjid sebagai bangunan yang dikhususkan untuk sembahyang lima waktu dan lainnya.

Dari kedua-dua definisi di atas dapat dilihat bahawa kedua-duanya bersepakat bahawa masjid itu hendaklah dikhususkan untuk sembahyang dan ianya tidak menjadi milik sesiapa kerana telah diwakafkan. Adapun perselisihan antara keduanya pula adalah pada tempat yang boleh dianggap sebagai masjid. Dr. Salih menegaskan tempat yang

boleh dianggap sebagai masjid hanyalah apabila ia dapat melindungi para jemaah dari hujan dan panas iaitu dengan dibinanya bangunan. Manakala bagi Imam Al-Qurtubi lapangan tanah itu sudah cukup untuk dijadikan masjid walau tanpa ada binaan asalkan ia dibatasi.

Bagi menghimpunkan kedua definisi ini, penulis mengertikan masjid adalah sebuah ruangan yang disiapkan secara rasmi sebagai dewan sembahyang mengikut adat setempat.

### Syarat pembinaan masjid

Daripada definisi masjid yang disebutkan di atas, para ulama bersetuju bahawa masjid itu hendaklah sebuah bangunan yang dikhususkan untuk mendirikan sembahyang dan ia telah dikeluarkan dari pemilikan seseorang dengan menjadikannya milik mutlak Allah taala. Dalam kata lain, ia hendaklah diwakafkan. Mereka berpegang dengan firman Allah taala, "Dan Sesungguhnya masjid itu hanyalah untuk Allah." (Al-Jin: 18)

### Jenis-jenis rumah ibadat kaum Muslimin

Para ulama telah membahagikan rumah ibadat kaum muslimin kepada dua jenis; a) masjid, dan b) musolla, atau dikenali juga dengan surau adalah rumah yang dijadikan tempat untuk sembahyang lima waktu tetapi tidak diwakafkan sebagai masjid. Dalam kata lain pemilik tanah atau bangunan masih mengekalkan hak miliknya di atas pekara tersebut. Kedua-dua lafaz ini ada digunakan Allah taala di dalam Al-Quran.

Masjid dikategorikan kepada 4 jenis:

1. Masjid Jami', masjid di mana sembahyang Jumaat, hari raya dan terdapat jemaah lima waktu didirikan di dalamnya.
2. Masjid Jamaah, masjid yang mempunyai imam dan muazzin yang dilantik secara rasmi oleh penguasa Islam di sesebuah daerah atau negeri dalam konteks Singapura ialah MUIS.

3. Masjid *Mahmul* (yang dibawa), masjid mudah alih kerana ia boleh dialihkan. Caranya ialah dengan memasang pasak pada sejadah atau tikar ke bumi dengan menggunakan paku dan seumpamanya sehingga ia tidak bergerak lalu diwakafkan sejadah itu sebagai masjid. Sejadah yang telah dijadikan masjid *mahmul* sah digunakan untuk iktikaf dan solat tahiyatul masjid. Orang junub pula dilarang untuk duduk di atasnya. Pekara ini dinyatakan di dalam kitab fikah mazhab Al-Syafi'i seperti *Tuhfat Al-Muhtaj* bagi Ibn Hajar, *Mughni Al-Muhtaj* oleh Al-Syarbini dan dalam kitab fikah solat oleh Sheikh Omar Al-Khatib.


4. Masjid *Buyut* (rumah), ruang di dalam rumah yang dikhususkan untuk sembahyang dan ibadat. Terdapat beberapa hadis yang menggalakkan orang Islam mengadakan sebuah ruang khusus dalam rumah mereka untuk tujuan ibadat. Saidatina Aisyah meriwayatkan bahawa Nabi menyuruh mengadakan masjid di dalam rumah dan menyuruh untuk mewangikannya dan membersihkannya (Riwayat Ibn Majah). Imam Al-Bukhari meletakkan satu tajuk khusus untuk bab ini dalam kitab Sahih beliau.

Jumhur ulama berpendapat Masjid *Buyut* adalah bukan masjid yang

boleh dilaksanakan iktikaf atau solat tahiyatul masjid di dalamnya kerana ianya tidak diwakafkan kecuali bagi mazhab Imam Abu Hanifah yang menganggapnya sah sebagai masjid hanya untuk kaum wanita sahaja.

Musholla pula terbahagi kepada beberapa jenis mengikut kitab fikih klasik:

1. Musolla `Eid (hari raya), tanah lapang yang di gunakan untuk solat hari raya puasa atau korban.
2. Musolla Jenazah, tempat yang dikhususkan untuk solat jenazah. Nabi menjadikan bahagian timur masjid sebagai tempat yang dikhususkan untuk solat jenazah.
3. Musolla *Hay*, bangunan kecil yang dibangunkan di sesebuah kampung untuk mendirikan syi'ar





solat jemaah. Termasuk di dalamnya ialah surau yang berada di bangunan-bangunan seperti sekolah, pasar raya dan sebagainya.

Di antara perbezaan ketara antara masjid dan musolla ialah pada status wakafnya. Jika ia di wakafkan maka ia adalah masjid dan jika tidak, ia adalah musolla.

Walaupun begitu terdapat sebahagian fuqaha Hanafi dan Hanbali yang berpendapat bahawa musolla 'Eid sama hukumnya dengan masjid. Sebahagian kecil ulama Hanafi juga berpendapat bahawa musolla jenazah juga sama dengan status masjid. Begitu juga pendirian Imam Al-Darimi terhadap musolla Hay.

Perselisihan kecil ini di anggap sebagai gambaran permulaan bahawa tidak semua fuqaha mensyaratkan bahawa masjid mestilah diwakafkan selamanya sebagai masjid.

### Jenis-jenis masjid di Singapura


Status masjid-masjid di Singapura dapat dibahagikan kepada empat kategori:

1. Masjid Wakaf, masjid yang di dirikan atas sebidang tanah yang telahpun diwakafkan oleh pemiliknya bagi tujuan pembinaan masjid. Rata-rata masjid yang berstatus wakaf di Singapura adalah yang dibina sebelum kemerdekaan republik ini seperti Masjid Al Abdul Razak dan seumpamanya.
2. Masjid T.O.L (Temporary Occupied License), masjid yang diberikan kebenaran atau keizinan sementara untuk mendiami sebidang tanah dengan bayaran tertentu. Jangka masa kebenaran ini antara setahun sehingga 3 tahun. Pihak masjid perlu membarukan keizinan atau lesen tersebut dengan membayar yurannya setiap kali tempoh yang diberikan hampir tamat.
3. Masjid M.B.M.F (Mosque building and Mendaki fund), masjid yang didirikan dengan menggunakan dana yang dikumpulkan oleh tabung pembangunan masjid yang lebih dikenali dengan MBMF. Tanah masjid ini dijual oleh pemerintah dengan harga nominal sebagai

bantuan kepada masyarakat Islam, dengan had tempoh selama 99 tahun.

4. Masjid Lease, masjid yang dibina di atas tanah berstatus lease.
5. Masjid yang tidak termasuk di dalam mana-mana kategori di atas. Hanya terdapat dua buah masjid di dalam bahagian ini; a) Masjid Temenggong di daerah Telok Belangah yang berdiri di atas tanah kerajaan Johor, dan b) Masjid Pulau Bukom yang berada di atas tanah milik syarikit minyak, SHELL.

### Wakaf yang dibataskan dengan waktu



Dalam tajuk ini penulis akan membincangkan keharusan menghadkan sesuatu yang diwakafkan dengan tempoh.

Untuk itu penulis telah membahagikannya kepada dua bahagian; a) Perbincangan mengenai syarat wakaf - "tidak boleh ianya terbatas dengan tempoh", dan b) Membataskan wakaf dengan waktu yang pada kebiasaannya barang yang diwakafkan itu akan luput atau musnah.

*Syarat wakaf - "tidak boleh ianya terbatas dengan tempoh"*

Para sarjana telah berselisih mengenai keperluan pada syarat ini di dalam wakaf:

Pendapat pertama, pegangan kebanyakan fuqaha, mensyaratkan wakaf tidak boleh terbatas dengan waktu tertentu kerana wakaf dari sudut bahasa membawa makna berhenti, iaitu yang diwakafkan itu diberhentikan hak pemindahan miliknya. Ini bermakna benda yang diwakafkan haruslah kekal selama-lama dan tidak boleh bertempoh untuk dipindah milik lagi setelah itu.

'Illah atau sebab pensyaratan ini adalah kerana wakaf itu seperti sedekah yang tidak boleh dibatasi dengan waktu. Begitu juga kerana hak memindah milik sesuatu yang telah diwakafkan itu gugur dengan sebab pewakaf telah memberhentikan pemilikan wakaf tersebut kepada Allah taala atau sesiapa yang diwakafkan perkara tersebut, maka

selayaknya barang wakaf itu tidak boleh bersangkut dengan waktu.

Pendapat kedua, pegangan sebahagian fuqaha terutama dari mazhab Maliki, mengharuskan wakaf itu dibatasi dengan waktu tertentu. Bahkan penulis mendapati mereka mengharuskan masjid itu dibina di atas tanah yang di sewa. Ini disebabkan fatwa mereka yang hanya wajib diwakafkan hanyalah bangunan masjid itu sahaja dan bukan tanahnya.

Berdasarkan kedua pendapat di atas, penulis mendapati bahawa pendapat pertama yang melarang wakaf dibatasi dengan waktu adalah lebih bertepatan dengan tujuan wakaf itu sendiri sama ada dari tujuan Akhirat, sebagai pahala yang berterusan untuk pewakif dan keperluan duniawi dalam menjaga kepentingan agama kerana dengan berkekalannya masjid akan memperkukuhkan penyebaran dakwah Islamiyah disamping syiar Allah tetap terlaksana di kawasan tersebut.

Walaupun demikian pendapat kedua lebih memenuhi keperluan masyarakat Islam Singapura dan sesuai dengan konteks atau undang-undang negara ini. Tidak dapat dinafikan di mana masyarakat Islam berada mereka memerlukan kepada satu bangunan yang sah digelar sebagai masjid bagi menjalankan ibadat dan menyebarkan syiar Islam. Berpegang pada pendapat pertama akan menjadikan kebanyakan masjid di Singapura terbatal status masjidnya dan ini mempunyai kesan negatif bagi kehidupan beragama seperti kehilangan ruang yang besar bagi umat Islam Singapura menunaikan iktikaf dan solat Tahiyat Masjid, sedangkan ia dapat dielakkan melalui pengaplikasian pendapat kedua dalam kehidupan masyarakat Islam Singapura.

*Membataskan wakaf dengan waktu bagi barang yang akan luput atau musnah*

Sebahagian fuqaha Al-Syafi'i menyatakan bahawa wakaf bertempoh adalah sah, jika perkara yang


diwakafkan itu pada kebiasaannya akan hancur sebelum tibanya tempoh tersebut. Contohnya ialah mewakafkan buku bagi tempoh seratus tahun. Waktu yang ditetapkan itu hanyalah *majazi* (kiasan) kerana wakaf itu hanya berkuasa selama buku atau benda yang diwakafkan itu wujud dan ia, pada kebiasaannya pula, akan hancur sebelum tempoh itu luput.

Jika kita melihat realiti ekonomi Singapura yang sentiasa berubah dari masa ke semasa seperti yang ditegaskan oleh Encik Lee Hsien Loong, Perdana Menteri Singapura pada perhimpunan hari

kebangsaan 2013 dan 2014, bahawa Singapura harus berubah dengan cepat untuk kemajuannya agar ia terus kekal dan terselamat. Contoh perubahan tersebut ialah pelabuhan Singapura yang di bina pada 1972 akan di pindahkan keseluruhannya menjelang 10 tahun dari sekarang, lapangan terbang yang dibuka pada awal 80an sedang menjalani proses perubahan dan naik taraf pada keseluruhan terminalnya, lebuh raya yang di buka 30 tahun lepas akan dimusnahkan dan dibina lebuh raya yang baru, kawasan perindustrian mega di

Jurong akan dialihkan sebelum ia mencecah lima puluh tahun dan kawasan perumahan juga tidak terkecuali dari proses ini.

Proses perubahan ini sudah semestinya menjejaskan pengimaran masjid bahkan boleh menjadikan masjid terpinggir. Antara contoh yang boleh di lihat ialah Masjid Penempatan Melayu Sembawang yang dibina pada tahun 60an. Dahulunya, ia dikelilingi oleh lima buah kampung Melayu dengan kadar penduduk Islam mencecah lebih dari seribu orang tetapi pada hari ini ia telah terpinggir dari perumahan, Masjid Al-Amin di Telok Blangah yang dahulunya sangat makmur kerana ramainya orang Islam yang mendiami sekeliling kawasan masjid, tetapi pada hari ini kebanyakan penduduk kawasan itu adalah bukan Muslim, dan Masjid kampung Delta dan Al-Firdaus.



Mengambil kira keperluan masjid untuk kekal relevan dalam menjalankan misinya, tapak masjid memainkan peranan besar. Oleh yang demikian terdapat fuqaha yang membolehkan penjualan masjid yang telah dipinggirkan untuk memberi laluan kepada pembangunan masjid di tempat yang lebih sesuai. Mereka juga mengharuskan menjual masjid kecil yang tidak mampu menanggung jumlah jemaah bagi membina masjid yang lebih besar di tapak yang lebih bersesuaian dengan keperluan masyarakat.

Oleh yang demikian, mantan Mufti Singapura, Sheikh Syed Isa Semait, enggan mengiktiraf batasan waktu selama 40 tahun yang disarankan pihak pemerintah pada mulanya bagi masjid-masjid baru. Bahkan beliau meminta agar tempoh pajakan tanah masjid dianjakkan hingga ke 99 tahun kerana pada kebiasaan adat Singapura, sesebuah masjid akan terpinggir sebelum tibanya tempoh 99 tahun itu, bersebab dengan perubahan persekitaran. Oleh itu, tempoh itu hanyalah sebuah tempoh *majazi*, yang tidak akan dapat dicapai oleh masjid di Singapura. Maka pada hakikat sebenarnya, masjid yang dibina diwakafkan hanya selama ia bermanfaat.

### Penutup

Berdasarkan perbincangan di atas penulis mendapati bahawa status masjid yang dihadkan dengan waktu tertentu di Singapura adalah sah sebagai masjid berdasarkan tiga perkara:

1. Tempoh yang dihadkan hanyalah sebuah tempoh *majazi* yang tidak mungkin dicapai oleh masjid di Singapura kerana masjid berkenaan telah terpinggir sebelum tibanya tempoh tersebut sehingga perlu mencari tapak baru yang lebih sesuai dan ini sesuai dengan pendirian para fuqaha yang berpendapat wakaf yang dihadkan dengan sebuah tempoh yang pada kebiasaannya, perkara yang di wakafkan itu akan hancur atau hilang manfaatnya sebelum tiba tempoh tersebut adalah sah. Dalam situasi sebenar, terdapat banyak contoh yang bahawa sebahagian masjid di Singapura terpinggir akibat proses perubahan dan kesan dari kemajuan yang berlaku di Singapura walau usianya belum menjangkau lima puluh tahun.
2. Sebahagian fuqaha membolehkan pembinaan masjid di atas tanah sewa, kerana yang wajib diwakafkan adalah bangunannya sahaja. Walaupun hujah pendapat ini dinilai lemah jika dibandingkan dengan pendapat satu lagi, ia memberi maslahat besar kepada masyarakat Islam Singapura dengan memenuhi tuntutan keperluan keagamaan mereka. Manakala pendapat yang kuat mengatakan tidak sah masjid didirikan di atas tanah yang bersifat sementara akan menjejaskan amalan agama dan akan memberi kesan buruk dalam jangka

panjang kepada masyarakat Islam Singapura. Pendirian ini sesuai dengan kaedah fikih yang berbunyi, “menolak kerosakan itu didahulukan”.

3. Perisytiharan wakaf masjid oleh Mufti Singapura pada umumnya akan berlaku setelah masjid itu siap keseluruhannya. Perisytiharan wakaf bagi dewan solat utama mencakupi karpetnya yang melekat pada tanah. Ini secara tidak langsung menjadikan hamparan itu sebagai masjid *mahmul* yang dinyatakan dalam mazhab Al-Syafi’ii. Walaupun bangunan masjid itu bertempoh, tetapi wakaf hamparannya tidak, maka ia boleh menjadi jalan alternatif juga bagi penyelesaian masalah ini.







## Islam dan Penuaan (Bahagian 2): Perancangan dan Pengurusan<sup>1</sup>

*Oleh Ustaz Muhammad Haniff Hassan*

...bersambung dari **Islam dan Penuaan (Bahagian 1): Pemikiran Asas**, di mukasurat 3.

Walaupun penuaan adalah sesuatu yang tabii dan tidak terelak bagi kehidupan manusia, Islam tidak menganjurkan sifat pasif dan berserah pada keadaan sahaja.

Terdapat banyak bukti bahawa Islam anjurkan Muslim untuk bersikap pro-aktif melakukan persiapan bagi menghadapi apa jua fasa-fasa kehidupan melalui perancangan yang baik sebelum kehadiran fasa itu dan pengurusan hidup yang rapi apabila melalui fasa itu. Anjuran itu ditujukan kepada Muslim sebagai individu dan masyarakat secara kolektif kerana masyarakat Muslim secara kolektif memikul amanah untuk memelihara kebajikan ahli-ahlinya.

Secara umumnya, Muslim dianjurkan untuk sentiasa berfikir tentang nasib dan keadaan hidupnya di masa hadapan. Hal ini boleh difahami dari firman Allah taala,

“Hai orang-orang yang beriman, bertakwalah kepada Allah dan **hendaklah setiap diri memperhatikan apa yang telah diperbuatnya untuk hari esok (akhirat)**, dan bertakwalah kepada Allah, sesungguhnya Allah Maha Mengetahui apa yang kamu kerjakan.” (Al-Hashr: 18)

Walaupun ayat ini berbicara mengenai persiapan bagi kehidupan Akhirat, namun semangat dan maksud dari anjuran ini juga meliputi soal perancangan dan persiapan bagi hidup di masa hadapan dalam kehidupan ini.

Maksud sebegini disokong oleh kemahiran membuat “bacaan” terhadap peristiwa-peristiwa yang berlaku dan takwil mimpi yang diberikan oleh Allah taala kepada nabi Yusuf.<sup>2</sup> Melalui kemahiran ini unjuran tentang masa hadapan dapat dibuat dan langkah-langkah yang perlu diambil dapat dirancang dengan baik.

Perkara ini secara khusus dicontohkan dalam peristiwa mimpi raja Mesir yang ditafsirkan oleh nabi Yusuf sebagai petanda akan berlaku kemarau selama beberapa tahun dan langkah-langkah yang perlu diambil.<sup>3</sup>

Allah taala mewahyukan kepada nabi Yusuf bukan hanya tentang musibah yang bakal berlaku tetapi juga langkah-langkah yang perlu diambil. Pemberitahuan langkah-langkah bagi menghadapi musibah ini memberi pengajaran tentang persiapan dan pengurusan sebelum dan ketika krisis berlaku.<sup>4</sup> Sesuatu keadaan yang tidak terelak dari berlaku, bukan bermakna tidak perlu berusaha untuk menangani risiko, mencegah kesan buruk atau, paling kurang, meminimalkan kesan buruk dari keadaan yang akan berlaku.

Dalam kisah ini, nabi Yusuf menawarkan kepada raja Mesir untuk menjadi pengurus perbendaharaan kerajaannya bagi membantu melaksanakan langkah-langkah persiapan bagi menghadapi musibah kemarau selama 7 tahun.<sup>5</sup> Usaha nabi Yusuf berjaya bukan hanya menyelamatkan negeri Mesir dari krisis tapi menjadikan ekonominya bertambah makmur kerana penduduk-penduduk di daerah lain yang terjejas datang berbondong ke Mesir untuk mendapatkan bekalan makanan.<sup>6</sup>

Kepentingan perancangan bagi masa depan yang baik dan bagi mengurus risiko dapat dilihat sejarah Nabi s.a.w dan banyak hadis sahih dari beliau.

Hijrah ke Madinah adalah satu contoh yang amat baik dan jelas akan kepentingan perancangan. Nabi s.a.w melakukannya dengan perancangan yang rapi dari

soal pemilihan tempat hijrah, persediaan tempat sebelum berhijrah, pemilihan laluan perjalanan ke Madinah, pelaksanaan tugas-tugas sokongan dan lain-lain.<sup>7</sup>

Peperangan Nabi s.a.w juga penuh dengan contoh perancangan rapi seperti pemilihan tempat yang strategik semasa perang Badr, penempatan pasukan pemanah di lereng gunung bagi menjaga pasukannya dari serangan dari belakang semasa perang Uhud, penggalian parit di keliling Madinah semasa perang Khandaq dan pengutusan perisik bagi mendapatkan maklumat musuh dalam semua peperangan beliau.

Melalui kata-kata beliau s.a.w pula, terdapat hadis yang berbunyi,

“Manfaatkanlah lima perkara sebelum lima perkara, 1) **waktu mudamu sebelum datang waktu tuamu**, 2) waktu sehatmu sebelum datang waktu sakitmu, 3) masa kayamu sebelum datang masa kefakiranmu, 4) masa luangmu sebelum datang masa sibukmu, dan 5) hidupmu sebelum datang matimu.”  
(Riwayat Al-Hakim)

Termasuk dalam erti memanfaatkan lima perkara yang dinyatakan ialah menggunakannya sebagai persiapan bagi menghadapi lima perkara yang sebaliknya dan ini pada dasarnya adalah anjuran mengurus peluang yang ada bagi menghadapi kemungkinan negatif yang pasti akan berlaku dalam hidup. Perkara pertama yang disebut dalam hadis pula berkaitan langsung dengan isu yang dibicarakan, iaitu anjuran merancang bagi masa tua agar risiko yang datang bersama masa itu dapat dielak atau diminimalkan.

Rasulullah s.a.w juga mengajar Muslim untuk berdoa agar dijauhi dari ditimpa oleh *arzal al-`umr* dan *al-haram* (usia tua yang lanjut yang umumnya diiringi dengan hilang ingatan dan nyanyuk dan lemah tubuh hingga terlanter sahaja),

“...dan aku berlindung kepadaMu dari dikembalikan kepada *arzal al-`umr*...”  
(Riwayat Al-Bukhari)

“Ya Allah, aku berlindung kepada-Mu dari kelemahan, rasa malas, rasa takut, *al-haram*, dan sifat kikir. Dan aku



juga berlindung kepada-Mu dari siksa kubur serta bencana kehidupan dan kematian.”  
(Riwayat Al-Bukhari dan Muslim)

Doa ini amat signifikan dalam soal persiapan dan pengurusan usia tua. Dalam Islam, apabila ada anjuran berdoa untuk sesuatu perkara ia bukan bermaksud memanjatkan permintaan kepada Allah taala agar dikurniakan perkara itu sahaja tetapi terkandung juga di dalamnya anjuran berusaha untuk memperolehnya. Sebagai contoh, anjuran Rasulullah s.a.w agar Muslim berdoa dikurniakan rezeki yang halal, ia juga anjuran agar kita memastikan agar sumber rezeki yang kita cari adalah halal. Demikian juga anjuran beliau s.a.w dalam hadis di atas agar dijauhi dari kesedihan, ia adalah anjuran agar Muslim menjauhi hidupnya dari sumber-sumber yang boleh menjatuhkan diri dalam kesedihan dan membina keupayaan diri untuk tidak mudah bersedih dengan apa jua masalah yang berlaku dalam kehidupan. Dengan ini, doa bukan sesuatu yang menjadikan seseorang itu pasif atau berharap pada Tuhan sahaja untuk menunaikan hajatnya.

Berdasarkan kefahaman ini, anjuran berdoa agar dijauhi dari *arzal al-`umr* dan *al-haram* juga satu anjuran agar Muslim berusaha untuk menjauhi faktor-faktor yang boleh mengakibatkannya.



حَتَّىٰ إِذَا بَلَغَ أَشُدَّهُ وَبَلَغَ أَرْبَعِينَ سَنَةً قَالَ  
 رَبِّ أَوْزِعْنِي أَنْ أَشْكُرَ نِعْمَتَكَ  
 الَّتِي أَنْعَمْتَ عَلَيَّ وَعَلَىٰ وَالِدَيَّ  
 وَأَنْ أَعْمَلَ صَالِحًا تَرْضَاهُ  
 وَأَصْلِحْ لِي فِي ذُرِّيَّتِي  
 إِنِّي تُبْتُ إِلَيْكَ وَإِنِّي مِنَ الْمُسْلِمِينَ

Doa ini juga memberitahu bahawa, walau usia tua tidak boleh dihalang kerana ia membabitkan soal ajal yang ketentuannya hanya di tangan Tuhan semata-mata, risiko-risikonya seperti kelemahan tubuh yang teruk, hilang ingatan dan nyanyuk, boleh dicegah atau diminimalkan. Mencegah dan meminimalkannya pula adalah sesuatu yang dianjurkan agama, dan bukan petanda tidak redha dengan sunah alam ciptaan Tuhan atau cuba melawan takdir. Jika ia sesuatu yang tidak boleh dielakkan, tidaklah Rasulullah s.a.w anjurkan berdoa agar dijauhi darinya. Jika mencegah darinya pula tercela, tidak juga doa ini diajar oleh Rasulullah s.a.w agar diamalkan oleh Muslim, khususnya jika doa itu difahami sebagai anjuran untuk melakukan tindakan konkrit sebagaimana yang dinyatakan di atas, bukan hanya berharap dan berserah kepada Allah taala sahaja.

Berdasarkan segala yang dinyatakan di atas, persiapan dan pengurusan usia tua yang meliputi langkah-langkah mencegah dan meminimalkan segala risiko yang berkaitan dengannya adalah sesuatu yang bukan hanya dibenarkan, tapi digalakkan oleh Islam. Oleh itu, Muslim dianjurkan agar bersikap proaktif dalam isu penuaan dan tidak berserah pada keadaan semata-mata atas nama tawakal kerana tawakal yang sebenar ialah berusaha dan juga berserah kepada Tuhan sebagaimana yang disabdakan oleh Rasulullah s.a.w, "Ikutlah ia (unta), kemudian bertawakal." (Riwayat Al-Turmuzi)

#### Aspek penuaan yang perlu diberi perhatian

Terdapat banyak aspek berkaitan warga tua yang perlu diberi perhatian. Sebahagian dari aspek-aspek ini dapat dikenalpasti melalui kajian-kajian sains sosial

dan kemanusiaan yang boleh dirujuk pada mereka yang pakar dalam bidang ini.

Namun dari sudut keagamaan, tiga daerah agak menonjol dalam teks-teks Al-Quran dan hadis yang perlu diberi perhatian dalam soal persiapan dan pengurusan usia tua di kalangan Muslim.

Pertama ialah aspek kerohanian warga tua.<sup>8</sup> Aspek ini diberi perhatian oleh agama bagi kalangan warga tua melalui peringatan ke atas mereka untuk bertaubat dan lebih menjaga ibadah kerana Islam menetapkan tanggungjawab beribudiyah kepada Allah taala adalah tanggungjawab yang berterusan, bermula dari usia baligh dan berakhir hanya setelah kematian, sebagaimana yang telah dinyatakan di atas dan sabda Rasulullah s.a.w pula tentang manusia yang paling buruk, "**Orang yang panjang usianya, tapi buruk amalannya.**" (Riwayat Al-Turmuzi). Islam juga memberi perhatian besar terhadap aspek kerohanian warga tua kerana secara tabi'ii kematian di kalangan mereka lebih dekat dan pasti. Dengan ini, warga tua dapat terpelihara dari terus dalam kelalaian hidup dan mengakhiri hidup dalam keadaan *husnul khatimah* (pengakhiran hidup yang baik dan terpuji). Oleh itu, apa jua program-program yang mengisi perancangan usia tua haruslah mengandungi aspek pengisian kerohanian bagi Muslim dalam golongan ini. Di sinilah peranan badan-badan Islam dan masjid-masjid menjadi kritikal bagi menyempurnakan program-program yang disediakan dan ditawarkan oleh agensi-agensi pemerintah yang biasanya bebas dari unsur-unsur keagamaan. Termasuk dalam perkara ini ialah bimbingan bagi warga tua bagaimana melaksanakan ibadah dalam keadaan diri yang semakin melemah dan sakit, agar semangat untuk beribadah yang disemai tidak pula menatijahkan kemudaratannya diri kerana ketiadaan ilmu tentang keringanan-keringanan yang diberikan oleh Islam untuk mereka.

Kedua ialah aspek ekonomi.<sup>9</sup> Hal ini dapat dilihat dari perintah Allah taala ke atas Muslim untuk mersedekahkan sebahagian harta kepada saudara mara dan Muslim yang kurang berkemampuan. Ia adalah perintah untuk memberi perhatian pada sokongan ekonomi kepada warga tua yang kurang kemampuan untuk menyara hidup sendiri;

"....dan **berbuat baiklah kepada ibubapa, kaum kerabat, anak-anak yatim, dan orang-orang miskin...**" (Al-Baqarah: 83)

"Bukanlah menghadapkan wajahmu ke arah timur dan barat itu suatu kebajikan, akan tetapi



sesungguhnya kebajikan itu ialah beriman kepada Allah, hari kemudian, malaikat-malaikat, kitab-kitab, nabi-nabi dan **memberikan harta yang dicintainya kepada kerabatnya**, anak-anak yatim, orang-orang miskin, musafir (yang memerlukan pertolongan) dan orang-orang yang meminta-minta..." (Al-Baqarah: 177)

Perhatian terhadap aspek ini dapat dilihat dari doa yang diajarkan oleh Rasulullah s.a.w,

"Ya Allah, aku berlindung padaMu dari rasa sedih dan gelisah, dari sifat lemah dan malas, dari sikap pengecut dan bakhil, **dan dari cengkaman hutang** dan penindasan orang." (Riwayat Al-Bukhari)

Memohon perlindungan dari cengkaman hutang bermaksud anjuran untuk pengukuhan ekonomi dan pengurusan kewangan yang baik kerana, biasanya, seseorang itu berhutang bila dia tidak mempunyai harta yang cukup untuk memenuhi keperluan diri hingga kemudiannya menjadi terbeban disebabkan terlalu banyak hutang.

Hadis yang menganjurkan Muslim memanfaatkan lima perkara sebelum kedatangan lima yang sebaliknya juga terkandung aspek persiapan sudut ekonomi, iaitu "[rebut] **masa kaya, sebelum datang masa miskin**". Dalam hal ini, program-program yang menjurus pada menabung bagi usia tua dan setelah bersara amat bersesuaian dengan ajaran Islam.

Ketiga ialah aspek kesihatan.<sup>10</sup> Perhatian terhadap aspek ini juga dapat dilihat dari doa yang diajarkan Rasulullah s.a.w agar dijauhi *al-haram* yang telah disebutkan di atas.

Demikian juga doa "[rebut] **masa sihat, sebelum datang masa sakit**" yang juga disebut di atas. Sihat dalam hadis ini boleh difahami juga dengan keadaan diri yang masih kuat semasa usia muda dan sakit pula ialah keadaan diri yang sudah lemah ketika usia tua. Perkara ini juga jelas kerana soal kemerosotan daya kekuatan tubuh dan kesihatan adalah satu aspek yang amat berkaitan dengan penuaan dan diketahui umum pula.

**Tanggungjawab siapa?**

Setelah disabitkan di atas bahawa persiapan dan pengurusan penuaan adalah anjuran agama Islam, isu asasi selanjutnya ialah siapakah yang bertanggungjawab menangani isu penuaan di kalangan masyarakat Muslim?

Dari pembacaan dan kefahaman dari dalil-dalil syarak dan karya ilmuwan berkaitan isu ini, empat golongan dapat dikenalpasti memikul tanggungjawab dalam persoalan persiapan dan pengurusan penuaan jatuh pada golongan berikut;


- individu Muslim
- ahli keluarga
- masyarakat
- negara<sup>11</sup>

Islam meletakkan tanggungjawab utama dalam soal persiapan dan pengurusan usia tua di bahu setiap individu Muslim kerana ia adalah fenomena yang berlaku di peringkat individu. Hal ini dapat dilihat pada doa yang dianjurkan oleh Rasulullah s.a.w. Ia adalah doa yang dianjurkan sebagai amalan setiap individu. Hadis yang menganjurkan merebut lima keadaan sebelum kedatangan lima keadaan yang berlawanan juga ditujukan kepada setiap individu.

Oleh itu, Islam mempertanggungjawabkan setiap individu untuk memainkan peranan, merancang dan mengurus hari tuanya tanpa terlalu menjejaskan kualiti hidupnya hingga membebankan diri dan orang lain. Namun adakalanya seseorang individu tidak mampu, gagal atau hilang upaya untuk menjaga kebajikan dirinya di usia tua. Dalam hal ini, tanggungjawab menjaga kebajikannya perlu dipikul atau dibantu oleh orang lain.

Di kalangan orang lain, Islam meletakkan tanggungjawab tentang isu yang dibicarakan ini di bahu ahli keluarga berdasarkan keakraban hubungan darah. Maka yang paling bertanggungjawab ialah anak dan kemudian pasangannya yang masih berkeupayaan dan seterusnya dari kaum kerabat yang lain.<sup>12</sup>





Tanggungjawab ke atas anak disebut dalam pelbagai ayat Al-Quran yang memerintah anak berlaku baik kepada ibu bapa mereka apabila mereka berada di usia tua (Al-Isra': 23-4 dan Luqman: 14-5). Hadis berkaitan perkara ini juga banyak. Disebut di bawah ini satu sebagai contoh sahaja,

"Sungguh terhina, sungguh terhina, sungguh terhina." Ada yang bertanya, "Siapa, wahai Rasulullah?" Beliau bersabda, "(Sungguh hina) seorang yang **mendapati kedua orang tuanya yang masih hidup atau salah satu dari keduanya ketika mereka telah tua, namun justeru ia tidak masuk syurga.**" (Riwayat Muslim)

Pasangan (suami atau isteri) yang masih mempunyai keupayaan pula adalah kerana ia adalah ahli keluarga yang terdekat. Maka selama mana ia masih mampu membantu pasangannya yang lemah kerana usia, ia bertanggungjawab untuk melakukannya.

Kerabat yang lain pula adalah kerana ia adalah hak silaturahmi yang Islam menuntut ditunaikan oleh Muslim terhadap mana-mana kerabatnya yang memerlukan bantuan.

Di dalam Al-Quran juga ada menyebut firman Allah taala,

"...Orang-orang yang mempunyai hubungan itu sebahagiannya lebih berhak terhadap sesamanya (daripada yang kerabat) di dalam kitab Allah..." (Al-Anfal: 75)

"...Dan bertakwalah kepada Allah yang dengan (mempergunakan) nama-Nya kamu saling meminta satu sama lain, **dan (peliharalah) hubungan silaturahmi...**" (Al-Nisa': 1)

"....dan **berbuat baiklah kepada ibu bapa**, kaum kerabat, anak-anak yatim, dan orang-orang miskin..." (Al-Baqarah: 83)

"Bukanlah menghadapkan wajahmu ke arah timur dan barat itu suatu kebajikan, akan tetapi **sesungguhnya kebajikan** itu ialah beriman kepada Allah, hari kemudian, malaikat-malaikat, kitab-kitab, nabi-nabi dan **memberikan harta yang dicintainya kepada kerabatnya**, anak-anak yatim, orang-orang miskin, musafir (yang memerlukan pertolongan) dan orang-orang yang meminta-minta..." (Al-Baqarah: 177)

Dalam ayat-ayat di atas, Allah taala memerintah Muslim menunaikan hak ke atas kaum kerabat yang meliputi membantu mereka apabila berada dalam kesulitan atau lemah dan Allah taala juga menyebut ahli kerabat dahulu sebelum golongan lain yang perlu dibantu.

Setelah ahli keluarga, amanah membela warga tua hendaklah dipikul oleh masyarakat sebagai satu fardu kifayah yang wajib ditunaikan.

Hal ini kerana membela nasib warga tua termasuk di dalam makna melakukan *al-ma'ruf*, *al-khair* dan *al-bir*, iaitu melakukan perkara kebaikan atau amal soleh yang menjadi sifat umat Islam dalam firman Allah taala,

"Dan hendaklah ada di antara kamu segolongan umat yang **menyeru kepada kebajikan, menyuruh kepada yang makruf** dan mencegah dari yang munkar; merekalah orang-orang yang beruntung." (Ali Imran: 104)

"Kamu adalah umat yang terbaik yang dilahirkan untuk manusia, **menyuruh kepada yang makruf**, dan mencegah dari yang mungkar, dan beriman

kepada Allah..." (Ali Imran: 110)

**"Dan tolong-menolonglah kamu dalam (mengerjakan) kebajikan dan takwa, dan jangan tolong-menolong dalam berbuat dosa dan pelanggaran..."** (Al-Maidah: 2)

Kesemua ayat ini menggunakan kataganti *antum* (kamu) yang merujuk kepada ramai. Ia memberi makna bahawa tugas ini adalah tugas kolektif yang perlu ditunaikan sebagai satu masyarakat, bukan hanya dilakukan oleh individu sahaja.

Dalam hadis, Rasulullah s.a.w memerintahkan Muslim bukan hanya berbuat baik kepada ibubapanya tetapi juga kepada teman-teman ibubapanya. Rasulullah s.a.w bersabda, sebagai menjawab soalan mengenai berbakti kepada ibu bapa yang telah meninggal dunia, "mengirim doa (mendoakan) dan memohon ampunan kepada Allah, menepati janji dan nazar yang pernah dibuat oleh ibubapa, **memelihara hubungan silaturahim serta memuliakan kawan dan kerabat ibubapamu.**" (Riwayat Abu Dawud).

Oleh kerana, pada umumnya, teman-teman ibubapa seseorang berusia sebaya, ini sekali gus berupa anjuran agar Muslim sebagai individu turut menyumbang dalam membela nasib golongan tua yang bermula dengan rakan sebaya ibubapa mereka. Ini juga untuk menanam nilai bahawa seorang Muslim bukan hanya perlu menjaga kaum kerabat yang dekat yang memerlukan bantuan, tapi juga perihatin terhadap nasib orang lain. Bersama Muslim yang lain, sikap ini diterjemahkan dalam pelbagai inisiatif kemasyarakatan pula.

Secara amali pada hari ini, amanah dan tanggungjawab ini dipikul oleh badan-badan bantu diri Islam di Singapura seperti Muhammadiyah, Jamiyah dan Pertapis yang telah pun memainkan peranannya. Dalam konteks ini juga, masjid-masjid boleh juga digembeling untuk turut menyumbang dalam persoalan ini.

Akhir sekali tanggungjawab menangani warga tua adalah di bahu negara berdasarkan sikap Rasulullah s.a.w yang mengiklankan kepada orang ramai bahawa dia (selaku ketua umat Islam dan pemimpin mereka) akan mengambil alih apa jua beban yang tidak mampu ditunaikan oleh Muslim seperti hutang si mati yang tidak dapat dilangsaikan. Sabda beliau s.a.w, "Saya lebih utama [dalam menjaga hak Muslim]

dari dirinya sendiri. Sesiapa yang meninggalkan harta, ia menjadi hak para warisnya. **Tetapi sesiapa yang meninggalkan hutang dan ..., ia kembali kepada aku dan menjadi tanggungjawab aku.**" (Riwayat Al-Bukhari dan Muslim)

Tanggungjawab ini juga dipikul kerana negara, dalam Islam, adalah institusi yang bertanggungjawab untuk mengurus Baitul Mal, iaitu harta umum yang meliputi juga wang zakat yang dikutip untuk disalurkan kepada asnaf yang layak yang termasuk membela warga tua samada sebagai fakir, miskin atau fi sabilillah.

Perkara ini pula telah dicontohkan oleh Saidina Umar dalam sejarah bahawa beliau pernah terjumpa seorang tua Yahudi meminta sedekah. Apabila diberitahu bahawa dia melakukannya kerana untuk menyara hidup dan membayar jizyah, Saidina Umar r.a. memerintahkan pegawainya untuk memberi Yahudi tua itu sara hidup dari Baitul Mal dan mengecualikannya dari jizyah dan cukai-cukai lain seraya berkata, "Tidak wajar bagi kita membiarkan dia terlantar di usia tua, sedangkan kita kutip cukai darinya semasa usia mudanya."<sup>13</sup>

Imam Abu Yusuf dalam bukunya *Al-Kharaj* meriwayatkan kandungan perjanjian Khalid bin Al-Walid r.a., selaku ketua tentera Islam, dengan orang-orang Kristian di Al-Hirah, Iraq,

"Mana-mana orang tua yang lemah dari bekerja atau ditimpa sakit atau dahulunya kaya tapi telah menjadi miskin dan saudara-saudara seagamanya bersedekah kepadanya, dihapuskan jizyah dari dia dan dibantu hidupnya dan keluarganya dari Baitul Mal

## Caregiver Prayer

**D**ear God, Give me the strength and hopeful perspective to be a good caregiver...

To care for my loved one, and still take care of myself;

To have patience with my loved one, and have patience with myself;

To remember that Your guiding spirit is within my loved one, as it is within myself;

To remember that my loved one is doing his or her best to deal with life's challenges, as I'm doing my best to deal with my own challenges;

To focus more on the good within my loved one, and on the blessings within both of our lives, as I also focus on the good within myself.

Help me, God, to encourage, to listen, and to share Your love...to share moments of faith, relaxation, and joy with my loved one... to help bring out the best in them, as You help me to bring out the best within myself. Amen.

## The Christophers





# JAMIYAH HOME FOR THE AGED (DARUL TAKRIM)

HOME ABOUT US PROGRAMMES & ACTIVITIES VIDEO GALLERY EVENTS

selama mana dia tinggal di daerah kekuasaan Islam.”<sup>14</sup>

Dalam konteks kehidupan di Singapura, kebijakan warga tua sememangnya satu tugas yang telah sedia dipikul oleh pemerintah Singapura. Pelbagai perancangan dan pelaksanaan polisi sedang diusahakan melalui pelbagai agensi pemerintah yang mana ia dapat dan perlu dimanfaatkan oleh badan-badan Islam dan masjid-masjid bagi melaksanakan amanah yang dinyatakan di atas. Turut berada di bawah kategori ini ialah Muis selaku salah satu agensi pemerintah yang juga bertanggungjawab dalam mengurus Baitul Mal dan wang zakat yang meliputi penjagaan hak kebijakan warga tua Muslim.

## Penutup

<sup>1</sup>Kertas ini disiapkan atas permintaan dari Masjid Darussalam bagi menjadi dasar bagi perancangan dan pelaksanaan program-program bagi warga tua Muslim di kawasan perumahan sekitar masjid secara khusus dan di daerah-daerah lain di Singapura secara umum.

<sup>2</sup>Lihat Yusuf: 6 dan 101.

<sup>3</sup>Lihat Yusuf: 43-55.

<sup>4</sup>Lihat Ibid.

<sup>5</sup>Lihat Ibid.

<sup>6</sup>Lihat Ibid dan Muhammad Haniff Hassan (t. t.), *Islam dan Pengurusan Kewangan Diri*, di <http://haniff.sg/pautan/islam-pengurusan-kewangan-diri/> (23 September 2018).

<sup>7</sup>Muhammad Haniff Hassan (2000), “Jadikan Hijrah iktibar perjuangan menuju kemajuan”, *Berita Harian*, 23 April.

<sup>8</sup>Lihat Mahjabeen Ahmad (2017), *Muslim Aged Care: A Practical Guide for Service Providers*, Adelaide: Tanpa penerbit; Fuad `Abd Al-Mun`im Ahmad

menghadapi penuaan melalui perancangan dan pengurusan usia tua yang rapi. Ia adalah satu kewajiban yang diamanahkan ke atas setiap Muslim secara individu dan secara kolektif sebagai satu masyarakat serta mereka yang diberikan kuasa ke atas urusan masyarakat umum.

Atas dasar ini, usaha menangani isu penuaan oleh badan-badan Islam dan masjid-masjid perlulah digalakkan.

Langkah pertama ialah dengan memahami idea asas tentang Islam dan isu penuaan sebagai dasar yang dibangun di atasnya pelbagai program berkaitan penuaan. Semoga penulisan ini telah berjaya memberi sumbangan ke arah ini.

(1424H), “Al-Musinnun: Huququhum Wa Wajibatuhum Fi Al-Islam”, *Al-Majallah Al-`Arbiyah Li Al-Dirasat Al-Amniyah Wa Al-Tadrib*; Bensaid and Grine (2014); Ahmad and Khan (2016).

<sup>9</sup>Yasin, Mubaraak dan Jani (2016); Al-Qaradhawi (2009).

<sup>10</sup>Al-Zubaidi (2012); Al-Badr (2011).

<sup>11</sup>Lihat Muhammad Ahmad Al-Qudhah dan `Abir `Abd Al-Aziz `Arif Al-Tamimi (2012), “Haq Al-Musin Fi Ri`ayat Al-Usrah Fi Al-Shari`ah Al-Islamiyah Wa Al-Mawathiq Al-Dawliyah”, *Al-Majallah Al-Urduniah Fi Al-Dirasat Al-Islamiyah*, 8:1; Al-Zubaidi (2012); Al-Sadhan (1999), ms. 24-52; Yasin, Mubaraak dan Jani (2016); Said (1989).

<sup>12</sup>Bensaid and Grine (2014), ms. 150-5.

<sup>13</sup>Al-Sadhan (1999), ms. 150; Sa`id (1989), ms. 32 and 35-6;

<sup>14</sup>Al-Qaradhawi (2009), ms. 10-1.